

ԼՈՒՐԵՐ ԵԿԵՂԵՑԻՆԵՐԻ ՀԱՄԱՇԽԱՐՀԱՅԻՆ ԽՈՐՀՐԴԻՅ

ՔՐԻՍՏՈՆՅԱՆԵՐԻ ՄԻՈՒԹՅԱՆ ԱՄԻՍ

Եկեղեցիների համաշխարհային խորհրդի կողմից 1974 թ. հունվար ամիսը հայտարարված է եղել որպես հատուկ աղոթքի ժամանակաշրջան քրիստոնյաների միության համար: Ժնևի կենտրոնի հաղորդման համաձայն, բողոքական և հռոմեական կաթոլիկ եկեղեցիները միասնաբար հայտարարել են անհրաժեշտությունն ու հնարավորությունը աղոթելու եկեղեցիների առավել մերձեցման և հուսալի միության համար:

* *

Վատիկանի՝ Քրիստոնյաների միության քարտուղարության նախագահ կարդինալ Ժան Վիլբրանդսը Հռոմի եկեղեցու և Ե. Հ. Խ.-ի հարաբերությունների ներկա վիճակի մասին արել է հետևյալ հայտարարությունը. «Մեր և Ե. Հ. Խ.-ի հարաբերությունները մեզ առաջնորդում են ավելի խոր և ջերմ հասկացողության, չնայած որ կաթոլիկ եկեղեցու որոշումը, դեռևս չմիանալու Ե. Հ. Խ.-ին, որոշ դժվարություններ է ստեղծում այս բնագավառում»: Վիլբրանդսը հայտարարել է նաև, որ Ե. Հ. Խ.-ի և կաթոլիկ եկեղեցու ներկայացուցիչներից բաղկացած աշխատանքային խումբն հանձնաժողովը կազմել է երեք տարվա համար իրագործելի աշխատանքի մի ծրագիր, որի առանձին հոդվածները լրիվ ընդունվել են աշխարհի խոշորագույն այս երկու կրոնական հաստատությունների ներկայացուցիչների կողմից:

Վիլբրանդսը շեշտել է, որ Ե. Հ. Խ.-ի 5-րդ համաժողովը, որը գումարվելու է Զակարտայում 1975 թվականին, «ունենալու է էկումենիկ առաջնակարգ մի հանգրվանի կարևորությունը» և որ, իբրև աղայիսին, զբաղեցնելու է բոլոր քրիստոնյաներին՝ ներառյալ կաթոլիկ եկեղեցուն:

* *

Իտալիայում հունվարի 27-ին շուրջ 3.000 բողոքական և կաթոլիկ հավատացյալներ մասնակցել են էկումենիկ մի արարողության, որը տեղի է ունեցել Տրենտի Մայր տաճարում, ուր ավելի քան չորս դար առաջ Տրենտի հայտնի ժողովը արտահայտել էր կաթոլիկ եկեղեցու բուռն հակազդեցությունը նորակազմ բարեկարգիչների դեմ:

Պաշտամունքի ընթացքում Իտալիայի, Իերմանիայի, Շվեյցարիայի և Ավստրիայի

տարբեր քաղաքներից ժամանած 400 հոգեվորականներ միմյանց հետ փոխանակել են «սիրո ողջույն»:

* *

Բողոքական և կաթոլիկ եկեղեցիների նախաձեռնությամբ Միացյալ Նահանգներում ռադիոհաղորդման 400 կայաններ ձայնափնել են հատուկ ծրագրով կրոնական հաղորդում «Ուստ մեզ կալ յաղօթս» բնաբանի շուրջ:

ԻՆԴՈՆԵԶԻԱՅԻ ԵԿԵՂԵՑԻՆԵՐԻ
ԽՈՐՀՈՒՐԴԸ ՆԱԽԱՊԱՏՐԱՍՏԱՎՈՒՄ Է
Ե. Հ. Խ.-ի 5-րդ ՀԱՄԱԺՈՂՈՎԻՆ

Ինդոնեզիայի եկեղեցիների խորհուրդը, որը 1975 թվականին Զակարտայում ընդունելու է Ե. Հ. Խ.-ի 5-րդ համաժողովի պատվիրակներին, այժմվանից ձեռնամուխ է եղել համաժողովի նախապատրաստման աշխատանքներին և արդեն իսկ կազմել է 50 անդամներից բաղկացած տեղական մի մարմին, որպես գործադիր հանձնաժողով՝ գլխավորությամբ դոկտ. Տ. Բ. Սիմատուպանգի, որը նախագահն է Ինդոնեզիայի եկեղեցիների խորհրդի և միաժամանակ անդամ Ե. Հ. Խ.-ի կենտրոնական և գործադիր կոմիտեների:

Կազմակերպիչ հանձնաժողովն ընդգրկում է ութ բաժիններ, որոնք կազմակերպելու են համաժողովը իր տեղական, մշակութային, էկումենիկ, տնտեսական, առողջապահական և այլ բնագավառների ընկնողությամբ ու պատրաստությամբ:

Համաժողովն անցկացվելու է «Հիսուս Քրիստոս ազատագրում է և միացնում» ընդհանուր թեմայով: Ներկայումս Ժնևում մշակվող աշխատանքային փաստաթղթերը, թարգմանված եվրոպական մի շարք լեզուներով, շուտով դրվելու են 267 անդամ եկեղեցիների տրամադրության տակ, որպեսզի յուրաքանչյուր եկեղեցի, նախքան համաժողովին մասնակցելը, հանգամանորեն ուսումնասիրի դրանք:

ՓՈԽԱԴԱՐՁ ՀԱՂՈՐԴՈՒԹՅՈՒՆ
ԿԱԹՈՒԼԻԿ ԵՎ ԲՈՂՈՔԱԿԱՆ
ԵԿԵՂԵՑԻՆԵՐԻ ՄԻՋԵՎ

Ֆրանսիայի Էլզաս-Լոթարինգիա քաղաքի բողոքական և հռոմեական կաթոլիկ հավատացյալներին վերջերս թույլատրվել է փոխադարձաբար սուրբ հաղորդություն ստանալ քույր եկեղեցիներում: Այս ան-

նախընթաց արտոնությունը իրագործվել է Ստրասբուրգի կաթոլիկ եպիսկոպոս Լևոն Արթուր Էլշեգերի կողմից, որը դեռևս մեկ տարի առաջ ընկել էր երկու կրոնական համայնքների միջև տեղի ունեցած խստն ամուսնությունների հետևանքով առաջացած կացությունը, որը վերոհիշյալ տեղական եկեղեցիները դնում էր նման մի որոշում ընդունելու անհրաժեշտության առաջ:

1973 թվականի դեկտեմբերին Էլզաս-Լոթարինգիայի լուսերական եկեղեցին իր 240 հազար հավատացյալներով ընդունել է կաթոլիկ եպիսկոպոսի առաջարկը փոխադարձ հաղորդություն մատակարարելու հարցում: Նույն քաղաքի բարեկարգյալ եկեղեցիների սինոդը ևս գոհունակությամբ է ընդունել կաթոլիկ եպիսկոպոսի այս նախաձեռնությունը:

Սույն քայլը, սակայն, առնվել է այն հաստատ պայմանով, որ փոխադարձ հաղորդությունը հավատացյալներին չհեռացնի իրենց պատկան եկեղեցիներից, այլ, ընդհակառակը, առիթ հանդիսանա, որ նրանք, հավատարիմ մնալով իրենց դավանանքին, միաժամանակ խորացնեն իրենց հավատը և էկումենիկ պարտավորության գիտակցությունը:

**ՀԱՄԱՏԵՂ ՀԱՂՈՐԴԱԳՐՈՒԹՅՈՒՆ
ՀՈՌՄԵԱԿԱՆ ԿԱԹՈՒԿ ԵՎ ԱՆԳԼԻԿԱՆ
ԵԿԵՂԵՑԻՆԵՐԻ ՄԵՐԶԵՑՄԱՆ ՄԱՍԻՆ**

Վերջերս Պողոս Զ Պապի և Քենթրբերիի արքեպիսկոպոս Մայքլ Ռեմգիի կողմից համատեղ մի հաղորդագրություն է հրապարակվել այն մասին, որ անգլիկան և կաթոլիկ եկեղեցիների միջև գոյացել է նախնական մի համաձայնություն՝ հոգևոր մատակարարության և պաշտամունքի վարդապետության վերաբերյալ: Սույն համաձայնագիրը ենթակա է լինելու հարստև ուսումնասիրության:

Նման մի մերձեցում անհրաժեշտ նախապայման է համարվել երկու եկեղեցիների պաշտամունքի և խորհրդակատարության հետագա փոխադարձ ճանաչման համար: Ներկայումս ճշված համաձայնությունը թեև սահմանափակվում է երկու եկեղեցիների կողմից կազմված միացյալ մի հանձնախմբի իրավասության շրջանակում միայն ու դեռևս չի ներկայացնում նրանց ամբողջական մարմինները, սակայն երկու կողմերին էլ հավասարապես քաջալերում է ձեռնամուխ լինելու հետագա ավելի խոր ուսումնասիրությունների:

Հաղորդագրությունը բաղկացած է երեք բաժնից.

ա) Հոգևոր մատակարարություններ եկեղեցու կյանքից ներս.

բ) Ձեռնադրյալ կարգերի մատուցած մատակարարություններ.

գ) Առաջին երկուսի հարաբերությունները:

ՀՆԴԿԱՍՏԱՆԻ ՀՈԳԵՎՈՐ ԾԵՄԱՐԱՆՆԵՐԸ

Հնդկաստանի Բանգալոր քաղաքում բողոքական, հոմեական կաթոլիկ և ուղափառ հոգևոր ճեմարանների ներկայացուցիչների միջև վերջերս տեղի է ունեցել խորհրդակցական մի հանդիպում, որ որոշվել է կազմել քրիստոնյա աստվածաբանական հաստատությունների միացյալ մի մարմին: «Նման մի ձեռնարկում,—նշել է Բանգալորի միացյալ աստվածաբանական ճեմարանի տեսուչ դոկտ. Ռաբլ Զանդրան,—կարող է առաջին քայլը համարվել ընդհանուր աստվածաբանական մի համալսարանի հաստատման ճանապարհին»:

Արդեն իսկ կազմվել է առժամյա մի հանձնախումբ՝ ուսումնասիրելու համար վերոհիշյալ ծրագրի իրականացման հնարավորությունները, մշակելու մի նախագիծ և այն ներկայացնելու համապատասխան եկեղեցական իշխանությանը ու ստանալու նրանց հավանությունը:

**ՄԵԾԱԳՈՒՄԱՐ ՀԱՏԿԱՑՈՒՄ Ե. Հ. Ն.-Ի
ԿՈՂՄԻՑ ԱՖՐԻԿԱՅԻ ՍՈՎՅԱԼՆԵՐԻ
ՕԳՆՈՒԹՅԱՆ ՀԱՄԱՐ**

Սույն թվի փետրվար ամսին Ե. Հ. Ն.-ի կենտրոնից հրապարակված մի հաղորդման համաձայն, Եկեղեցիների համաշխարհային խորհուրդը որոշել է ձեռնարկել մեկուկես միլիոն դոլլարի լրացուցիչ մի հանգանակության՝ օգնելու համար Աֆրիկայում տառապող բազմահազար սովյալների, որոնք բնակվում են Սահելյան գոտու շրջանում, Ատլանտյանից մինչև Կարմիր ծով:

Նախապես կատարված հանգանակությունից մեկ միլիոն դոլլար արդեն հատկացվել է Սահելի և Եթովպիայի կարոտյալներին: Ե. Հ. Ն.-ի համար այժմ անհետաձգելի անհրաժեշտություն է դարձել օգնության հասնել Սուդանի, Քենիայի, Ալժիրի, Նիգերիայի և այլ շրջանների բնակիչներին, որոնց կյանքը լուրջ վտանգի ենթակա է այդ շրջաններում տիրող երաշտի հետեվանքով:

Ե. Հ. Ն.-ի նախաձեռնությամբ հատուկ ծրագրեր են մշակվել սնունդ մատակարարելու Եթովպիայի սովյալներին և որդեգրելու որբացած բազմաթիվ երեխաների: Նույնպիսի ծրագրեր այժմ գործադրվում են նաև Սուդանում և Քենիայում:

ՀՈՒՆԱՍՏԱՆԻ ՕՐԹՈԴՈՔՍ ԵԿԵՂԵՑՈՒ ՆՈՐ ԳԱՀԱԿԱԼԸ

Հունաստանի օրթոդոքս եկեղեցու եպիսկոպոսաց Սինոդը սույն թվականի հունվարի 12-ին Աթենքի արքեպիսկոպոս է ընտրել Յանինայի միտրոպոլիտ Սերաֆիմ եպիսկոպոսին: Նրա ընտրությունը վավերացվել է Հունաստանի Հանրապետության նախագահ Ֆեդոն Գիզիկիսի կողմից: Գահակալության հանդիսությունը տեղի է ունեցել Աթենքի Մայր տաճարում:

Հունաստանի օրթոդոքս եկեղեցու նոր գահակալը հաջորդում է Աթենքի նախկին արքեպիսկոպոս Հերոնիմոսին, որը անցած տարվա դեկտեմբերի 15-ին հրաժարվել էր հունական եկեղեցու գլխավորի իր պաշտոնից՝ եկեղեցական և քաղաքական շրջանակների կողմից իր դեմ ուղղված բռնադատությունների պատճառով, որոնք, ըստ նրան, «ծանր հարված էին հասցնում եկեղեցու վարկին և հեղինակությանը»:

Կառավարական հրամանագրով հունական եկեղեցու նախկին արքեպիսկոպոսի ընտրությանը, և որոնք, կանոնական իրավունքով սահմանված կարգին հակառակ, նշանակվել էին նրա կողմից, չի թույլատրվել մասնակցել Հունաստանի եկեղեցու նոր գահակալի ընտրությանը: Այսպիսով, ընտրությանը մասնակցած 28 եպիսկոպոսներից 20-ը իրենց ձայնը տվել են Յանինայի միտրոպոլիտին:

Սերաֆիմ արքեպիսկոպոսը ծնվել է 1913 թ. կենտրոնական Հունաստանի Կարդիցա գյուղում: Աթենքի համալսարանի աստվածաբանության ֆակուլտետն ավարտելուց հետո, 1938 թ. ստացել է սարկավագության աստիճան, ապա 1942 թ. ձեռնադրվել է կուսակրոն քահանա: Հունաստանում գերմանական գրավման տարիներին մասնակցել է դիմադրական շարժմանը: 1942 թվականից մինչև 1949 թվականը եղել է Հունաստանի օրթոդոքս եկեղեցու ս. Սինոդի քարտուղարը: 1949 թ. նշանակվել է Արտայի և ապա, 1958 թ. Յանինայի միտրոպոլիտ: Իր հոգևոր ծառայության զուգընթաց ծավալել է մարդասիրական լայն գործունեություն և եղել է հասարակական բընույթի բազմաթիվ կազմակերպությունների նախագահ:

Հունաստանի եկեղեցու նոր գահակալի վրա այժմ ծանրանում է իր եկեղեցու եպիսկոպոսներին միացնելու և մասնավորապես եկեղեցական կանոնադրությունը վերանախելու դժվարին աշխատանքը. նա պետք է աշխատի եկեղեցու կանոնադրությունը վերափոխել այնպես, որ կարողանա միաժա-

մանակ բավարարել թե՛ պետությանը և թե՛ իր եկեղեցու նվիրապետությանը, որի անդամների մեծ մասը այն կարծիքին է, թե կառավարությունը շատ է միջամտում եկեղեցու գործերին:

Սերաֆիմ արքեպիսկոպոսի ընտրությունն ու գահակալությունը խոր գոհունակությամբ է ընդունվել Կոստանդնուպոլսի տիեզերական պատրիարքության կողմից, որը Հունաստանի եկեղեցու հոգևոր պետին նկատում է որպես «տիեզերական պատրիարքության ջերմ բարեկամ և բարի կամքի տեր մի անձնավորություն»:

ԲՈՒԼՂԱՐԻԱՅԻ ՔՐԻՍՏՈՆՅԱ ՀԱՄԱՅՆՔԸ

Պրոֆ. Տոդոր Սաբեր Սոֆիայի օրթոդոքս աստվածաբանական ճեմարանի գլխավոր դասախոսներից է և միաժամանակ անդամ Ե. Հ. Խ.-ի կենտրոնական կոմիտեի: Պրոֆ. Սաբերի հաղորդման համաձայն, Բուլղարիայի օրթոդոքս եկեղեցին դարեր շարունակ նշանակալից դեր է կատարել երկրի մշակութային կյանքի զարգացման և ազգային արժեքների անաղարտ պահպանման գործում: Վերջին տասը տարիների ընթացքում բուլղարական եկեղեցին իր գործուն մասնակցությունն է քերել թե՛ համաշխարհային խաղաղության պաշտպանության գործին և թե՛ Էկումենիկ շարժմանը՝ որպես Ե. Հ. Խ.-ի անդամ:

Բուլղարիայում ապրող մոտ 6 միլիոն քրիստոնյաների մեջ այսօր կան 11 օրթոդոքս թեմեր և երկու այլ թեմեր էլ՝ արտասահմանում, մեկը Հյուսիսային Ամերիկայում, մյուսը՝ Ավստրալիայում՝ 12 միտրոպոլիտներով, 10 եպիսկոպոսներով, 4.500 քահանաներով և 400 վանականներով: Ամբողջ Բուլղարիայում կան 3.700 եկեղեցիներ և մատուռներ, ինչպես նաև 120 վանքեր:

Բուլղարական օրթոդոքս եկեղեցին ունի երկու կրոնական՝ հոգևոր և աստվածաբանական ուսումնական հաստատություններ՝ 320 ուսանողներով և հրատարակչական հատուկ կենտրոնով:

Բուլղարիայի մեծագույն համայնքը, օրթոդոքս եկեղեցուց հետո, հռոմեական կաթոլիկ համայնքն է՝ 50 հազար հավատացյալներով և 40 քահանաներով: Կան նաև նույնքան թվով բողոքական այլևայլ հարանվանությունների հետևող քրիստոնյաներ:

Ե. Հ. Խ.-ի ՆԵՐԿԱՅԱՑՈՒՑԻՉՆԵՐԸ ՉԼԻՈՒՄ

Մինչ հինգ հազար օտարերկրացի ապաստանյալներ Չիլիում անձկությամբ

սպասում են երկրից հեռանալու համար, մարդկանց ուշադրությունն այժմ բևեռված է Չիլիում մարդու իրավունքների պաշտպանության հարցի վրա: Պետական հեղաշրջումից ի վեր հազարավոր մարդիկ նետված են բանտերը: Միայն Սանտյագոյում ավելի քան 200.000 հոգի կորցրել են իրենց աշխատանքը քաղաքական և տնտեսական պատճառներով:

Չիլի ուղարկված Ե. Լ. Ն.-ի ներկայացուցիչների հրապարակած հաղորդումների համաձայն, Չիլիում ամենակուպիտո կերպով ոտնահարվում են մարդու իրավունքները, և երկիրը գտնվում է ծանր տագնապի սպառնալիքի տակ: Բացի այդ, ամմարդկային խոշտանգումների են ենթարկվում իշխող ռեժիմին հակադրվելու մեջ մեղադրվող հազարավոր անմեղ մարդիկ:

Ե. Լ. Ն.-ի կողմից վերջերս մի կոչ է ուղղվել բոլոր անդամ եկեղեցիներին, որպեսզի 1.200.000 դոլլարի մի հանգանակություն ձեռնարկվի 1974 թվականի համար: Այդ գումարի կեսը հատկացվելու է այն կոմիտեին, որը ներկայումս աշխատում է Չիլիում ի նպաստ խաղաղության վերահաստատման, և որն ստեղծվել է Չիլիի բոլորքական, կաթոլիկ և օրթոդոքս եկեղեցիների կողմից՝ Սանտյագոյի կաթոլիկ եպիսկոպոս Ֆերնանդո Արիգուայի և լուսեբրական եկեղեցու եպիսկոպոս Հելմուտ Ֆրենցի նախագահության ներքո: Այս կոմիտեի նպատակն է օժանդակել զոհվածների ընտանիքներին, ապահովել ձերբակալված անձանց դատական պաշտպանությունը և օգնել բոլոր նրանց, ովքեր կորցրել են իրենց աշխատանքը:

Նախատեսված գումարի մնացած մասը տրամադրվելու է Լատինական Ամերիկայի մի շարք երկրներում հաստատված ընդունման այն կենտրոններին, որոնք օգնում են չիլիացի ապաստանյալներին՝ բնակության վերջնական հանգրվան գտնելու համար: Ներկայումս 4.500-ի է հասնում թիվը այն ապաստանյալների, որոնք ժամանակավորապես ապաստան են գտել Արգենտինայում, Կոստա-Ռիկայում, Հոնդուրասում, Էկվադորում և Պանամայում:

ՀԱՆՐԻԴՊՈՒՄ ԵՎՐՈՊԱԿԱՆ
ԵԿԵՂԵՑԻՆԵՐԻ ԿՈՆՖԵՐԱՆՍԻ ԵՎ
ԵՎՐՈՊԱՅԻ ԵՊԻՍԿՈՊՈՍԱԿԱՆ
ԿՈՆՖԵՐԱՆՍԻ ԽՈՐՀՐԴԻ
ՆԵՐԿԱՅԱՑՈՒՑԻՑՆԵՐԻ ՄԻՋԵՎ

Սույն թվի փետրվարի 6—7-ը Ցյուրիխում (Շվեյցարիա) տեղի է ունեցել Ե. Լ. Ն.-ին առընթեր Եվրոպական եկեղեցիների կոնֆերանսի (Ե. Ե. Կ.) և հոռմեական կաթոլիկ եկեղեցուն առընթեր Եվրոպայի ե-

պիսկոպոսական կոնֆերանսի խորհրդի (Ե. Ե. Կ. Ն.) ներկայացուցիչների երրորդ հանդիպումը:

Հանդիպմանը մասնակցել են Ե. Ե. Կ. Ն.-ի կողմից՝ Մարսելի արքեպիսկոպոս Ռոմե Էշեգարայը, Կոպենհագենի եպիսկոպոս Հանս Մարտենսը, Կուրայի եպիսկոպոս Իոհաննես Վոնդերախը և Ե. Ե. Կ. Ն.-ի գլխավոր քարտուղար մոնսեյնոր Ալոն Սուստարը: Ե. Ե. Կ.-ի կողմից՝ Էռնեստ Վիլմը (նախագահ), Տալլինի և Էստոնիայի միտրոպոլիտ Ալեքսիս և Ե. Ե. Կ.-ի գլխավոր քարտուղար Գլեն Գարֆիլդ Վիլյամսը:

Հանդիպման ընթացքում քննարկվել են վերոհիշյալ եվրոպական երկու կազմակերպությունների հնարավոր գործակցության հետ առնչվող մի շարք հարցեր: Ժողովում հաղորդում է տրվել Ե. Ե. Կ.-ի և Ե. Ե. Կ. Ն.-ի անցած տարեշրջանում կատարված աշխատանքների մասին:

ԵԿԵՂԵՑԻՆԵՐԻ ՀԱՄԱՇԽԱՐՀԱՅԻՆ
ԽՈՐՀՐԴԻ (Ե. Լ. Ն.) ԵՎ
ԽԱՂԱՂՈՒԹՅԱՆ

ՀԱՄԱՔՐԻՍՏՈՆԵԱԿԱՆ ԿՈՆՖԵՐԱՆՍԻ
(Ն. Լ. Կ.) ՆԵՐԿԱՅԱՑՈՒՑԻՑՆԵՐԻ
ՀԱՆՐԻԴՊՈՒՄԸ ԺՆԵՎՈՒՄ

Սույն թվականի փետրվարի 28-ից մարտի 1-ը ժամում տեղի է ունեցել հանդիպում Ե. Լ. Ն.-ի և Ն. Լ. Կ.-ի ներկայացուցիչների միջև՝ գլխավորությամբ երկու կազմակերպությունների գլխավոր քարտուղարներին:

Միության, խաղաղության, արդարության և ազատության հարցերի շուրջ ծավալված աստվածաբանական աշխույժ բանավեճը հանդիպման մասնակիցներին հանգեցրել է այն խոր ըմբռնմանը, որ եկեղեցիները իրենց գործունեությունը պետք է ծառայեցնեն խաղաղության գործին:

Հատուկ ուշադրություն է նվիրվել այն ուղիներին, որոնց միջոցով այդ երկու կազմակերպությունները կկարողանան համագործակցել տարբեր բնագավառներում: Այդ բնագավառներն են՝ ՄԱԿ-ի գործունեության պաշտպանությունը ազգային մակարդակով, մարդու իրավունքների պաշտպանության հարցը և սպառազինությունների մրցավազքի ու ռասիզմի դեմ մղվող պայքարը:

Հանդիպման ընթացքում եղել են գործնական առաջարկություններ երկու կազմակերպությունների միջև հետագայում համագործակցությունը զարգացնելու ուղղությամբ: Ն. Լ. Կ.-ի ներկայացուցիչները ցանկություն են հայտնել միմյանց միջև կայացած բանավեճը շարունակելու հաջորդ տարի: